

中國方志叢書·華北地方·第三一三號

據

清·舒其紳等修·嚴長明等纂
乾隆四十四年刊本

影印

陝西 省

西安府志

(四)

成文出版社有限公司印行

西安府志卷第三十七

人物志

隱逸

流寓

方伎

釋老

隱逸

漢

邵平史記蕭相國世家邵平者故秦東陵侯秦破爲布衣
貧種瓜長安城東瓜美時俗謂之東陵瓜

摯峻高士傳字伯陵長安人與太史遷交好退身修德隱
於峴山遷旣親貴乃以書勸峻曰遷聞君子所貴乎道者
三太上立德其次立言其次立功伏惟伯陵材能絕人高
尚其志以善厥身冰清玉潔不以細行荷累其名固已貴
矣然未盡太上之所由願致意焉峻報書曰峻聞古之君

子料能而行度德而處故悔恡去於身利不可以虛受名不可以苟得漢興帝王之道始顯能者見利不肖者自屏亦其時也周易大君有命小人勿用徒欲偃仰從容以遊餘齒耳後遷爲李陵遊說下腐刑果以悔恡被辱峻卒於岍岍人立祠號曰岍居士奉祀不絕

成公高士傳成帝時人自隱姓名常誦經不交世利時人號曰成公成帝出遊問之成公不屈節上曰朕能富貴人能殺人子何逆朕成公曰陛下能貴人臣能不受陛下之官陛下能富人臣能不受陛下之祿陛下能殺人臣能不犯陛下之法上不能折使郎二人就受政事十二篇

安邱望之高士傳長安人少治老子不求進官號安邱丈

人成帝欲見之辭不肯上以其道德深重常宗師之望之
愈自退損爲巫醫於民間著老子章句扶風耿況王汲等
皆師事之

張仲蔚高士傳平陵人與同郡魏景卿俱修道德隱身不
仕明天官博物善屬文好詩賦常居窮素所處蓬蒿没人
閉門養性不治榮名唯劉龔知之

項仲山三輔決錄安陵清者有項仲山飲馬渭水日與三
錢以償之

鄭朴高士傳字子真谷口人修道靜默成帝時大將軍王
鳳以禮聘之不屈揚雄盛稱其德曰谷口子真耕於巖石
之下名震京師馮翊人刻石祠之至今不絕雲陽宮記子

眞所居名爲鄭泉

蔣詡漢書鮑宣傳杜陵人兗州刺史以廉直爲名王莽居攝免官歸里臥不出戶卒於家三輔決錄詡歸鄉里荆棘塞門舍中有三徑不出惟求仲羊仲從之遊二人不知何許人皆治車爲業時人謂之二仲

高恢高士傳字伯達京兆人少治老子恬虛不營世務與梁鴻善隱於華陰山中及鴻東游思恢作詩曰烏嚶嚶兮友之期念高子兮僕懷思想念恢兮爰集茲二人遂不復相見恢高抗匿耀終身不仕焉

梁鴻後漢書字伯鸞平陵人受業大學家貧尚節介博覽無不通而不爲章句牧豕上林苑誤遺火延及他舍鴻訪

燒者問所失以豕償之主以爲少鴻願以身居作主人許之執勤不懈歸鄉里勢家慕其高節多欲女之鴻並絕不娶同縣孟氏女擇對不嫁鴻聘之有頃共入霸陵山中以耕織爲業詠詩彈琴仰慕前世高士爲四皓以來二十四人作頌因東出關作五噫之歌與妻子居齊魯閒又去適吳依大家臯伯通居廡下爲人賃舂每歸妻爲具食舉案齊眉鴻潛閉著書十餘篇疾且困告主人曰慎勿令我子持喪歸去及卒伯通爲求葬地於要離冢咸曰要離烈士伯鸞清高可令相近葬畢妻子歸扶風

韓康後漢書字伯休霸陵人常遊名山採藥賣長安市中口不二價者三十餘年有女子從康買藥康守價不移女

子怒曰公是韓伯休乃不二價乎康歎曰我欲避名乃小
女子皆知有我何用藥爲逖入霸陵山中博士公車連徵
不至桓帝時備元纁安車聘之不得已許諾辭安車自乘
柴車冒晨先發至亭亭長以韓徵君當過發人修道橋見
康柴車幅巾以爲田叟也使奪其牛康卽釋駕與之有頃
使者至奪牛翁乃徵君也使者欲奏殺亭長康曰此自老
子與之亭長何罪乃止中路逃遁以壽終

馬瑤後漢書矯慎傳茂陵人隱沂山以免冑爲事所居俗
化百姓美之號馬牧先生

三國

扈累魏略字伯重京兆人初平中山東人有青牛先生字

方正客三輔曉知星歷風角鳥情累隨方正遊學得其術
有婦無子三輔亂隨方正入漢中漢中壞隨徙民詣鄴喪
其婦黃初元年又徙詣洛陽遂不復娶婦獨居道側以甌
甌爲障施一厨牀食宿其中晝日潛思夜起仰視星宿吟
咏內書人或問之閉口不言嘉平中年八九十纔若四五
十者縣官以其孤老給廩日五升不足食頗行傭以裨糧
食不求美衣弊緼服後病亡

劉仲始魏志裴潛傳注長安市僧爲市吏所辱乃感激遂
行學問經明行修流名海內後以有道徵不就

南宋

韋元南史韋叡傳避吏隱長安南山武帝入關以太尉掾

徵不至

北魏

杜景北史杜銓傳字宣明京兆人學通經史州府交辟不就子裕字慶延文學相傳仕齊位止樂陵令齊亡退居教授終於家

北周

韋曼周書字敬遠杜陵人志尚夷簡弱冠被召拜雍州從事謝疾去前後十見徵辟皆不應明帝卽位禮敬愈厚且爲詩貽之曼答詩願謁帝大悅勅有司給河東酒一斗號曰逍遙公時晉公護廣營第宅召曼訪以政事曼仰視其堂歎曰甘酒嗜音峻宇雕牆有一於此未或不亾武帝嘗

與曼夜宴大賜縑帛曼惟取一疋帝益重之孝寬爲延州刺史曼至州寬以所乘馬及轡勒與曼曼以其華飾笑謂曰舍舊錄新非吾志也乘舊馬以歸宣帝在東宮遺曼書問立身之道曼對曰儉爲德之恭侈爲惡之大願陛下察之曼少畱情著述手自抄錄數十卷晚年虛靜惟以體道會眞爲務宣政元年卒於家武帝遣使祭贈有加

唐

孫思邈唐書華原人通百家說善言老莊獨孤信見其少異之曰聖童也顧器大難爲用耳及長居太白山隋文帝輔政以國子博士召不拜密語人曰後五十年有聖人出吾且助之太宗初召詣京師年已老而聽視聰瞭帝歎曰

有道者欲官之不受顯慶初復召見拜諫議大夫固辭上
元元年稱疾還山思邈於陰陽推步醫藥無不善孟詵盧
照鄰等師事之永淳初卒

田游巖唐書三原人永徽時補太學生罷歸入太白山母
及妻皆有方外志自蜀歷荆楚愛夷陵青溪止廬其側長
史李安期表其才名赴京師行及汝辭疾入箕山居許由
祠旁自號由東鄰高宗幸嵩山遣問其母賜藥物絮帛帝
親至其門游巖野服出拜儀止謹樸帝曰先生佳否曰臣
所謂泉石膏盲煙霞痼疾者帝因勅游巖將家屬乘傳赴
都拜崇文館學士進太子洗馬裴炎死坐素厚善放還山
蠶衣耕食不交當世惟於韓法昭宋之問爲方外友云

武攸緒唐書則天兄惟良子恬淡寡欲好易莊周書少變姓名賣卜長安市得錢輒委去

韋况唐書韋安石傳斌子萬年人少隱玉屋山孔述睿以諫議大夫名薦况爲右拾遺不拜未幾以起居郎召半歲輒棄官去徙家龍門除司封員外郎稱疾固辭元和初授諫議大夫勉諭到職數月乞骸骨以太子左庶子致仕卒况雖世貴而志冲遠不爲聲利所遷當時重其風操

五代

鄭元素南唐書華原人少習詩禮避亂南遊居廬山青牛谷高臥四十餘年採薇食蕨絃歌自若構椽剪茅於舍後會集古書至千餘卷

宋

种放宋史字明逸洛陽人沉默好學父卒與母隱居終南山豹林谷之東明峰淳化三年陝西轉運使宋惟幹言其才詔召之稱疾不起太宗嘉其節賜以緡錢使養母咸平元年母卒放水漿不入口三日廬於墓側詔賜錢帛米助其喪四年兵部尚書張齊賢言放孝行純至簡樸退靜明年齊賢守京兆復請加旌賁放赴闕對崇政殿詢以民政邊事放曰明王之治愛民而已餘皆謙讓不對卽日授左司諫直昭文館六年春表暫歸山詔許其請將行遷起居舍人十月遣使撫問圖其林泉居處以獻景德元年十月來朝二年擢爲右諫議大夫上表乞嵩少養疾許之大宁

祥符元年判集賢院拜給事中二年四月歸山四年正月
復來朝拜工部侍郎放屢至闕下俄復還山人貽書嘲其
出處之跡放不答王嗣宗守京兆放乘醉慢罵之嗣宗遣
人責放不法仍條上其事放遂徙居嵩山八年十一月忽
取前章疏稿焚之召諸生會飲酒數行而卒上親製文遣
內侍致祭歸葬終南

宋澥宋史長安人清節不仕與种放魏野遊多篇什酌唱
高懌宋史字文悅荆南高季興四世孫通經史百家之書
聞种放隱終南山乃築室從受業放不敢處以弟子行與
同時張堯許勃號南山三友會詔舉沉淪寇準薦之辭不
起景祐中錄國初侯王後懌推其弟欣得官及范雍建京

兆府學名懌講授諸生席閒嘗數十百人杜衍嘗請賜處士號乃命爲大理評事懌固辭仁宗號安素處士賜良田五百畝文彥博表其經術該通有高世之行可以勵風俗詔賜第一區嘉祐中除光祿寺丞復固辭夢道士持素書聘爲白鹿洞主卒

李植圖繪寶鑑字化光京兆人觀察使士衡孫自幼好學道不樂婚宦工畫山水劉原父嘗贊之

元

楊恭懿元史字元甫奉元人力學強記尤深於易禮春秋父歿水漿不入口者五日居喪盡禮宣撫司以掌書記辟不就至元七年與許衡俱被召恭懿不至十一年太子下

教中書俾如漢聘四皓者以聘恭懿乃至京師旣入見世祖勞其遠來十二年侍讀學士徒單公履請設取士科恭懿言宜勅有司舉有行檢通經史之士試以經藝論策帝善之會北征恭懿遂歸田里十六年詔安西王相敦請赴闕詔與太史院改歷十七年進奏更造新歷授集賢學士兼太子院事十八年辭歸二十年以太子賓客召二十一年以昭文館學士召二十九年以議中書省事召皆不行三十一年卒年七十

駱天驤馬志字飛卿長安人博涉羣書遊心翰墨樂道邱園不求聞達

張全馬志字之美涇陽人幼讀書不求聞達以山水文籍

自娛雖在布衣邑人待如公輔

第五勝愚賈志字仲學富平人元末不悅仕進鑿洞山中
甘貧樂道日與同志優游山水

明

閻正叔侯伯正賈志俱渭南人泰定中同舉進士正叔授
五經博士伯正授太常博士後以世亂棄官隱居田里洪
武初並被徵至京深衣幅巾入見以年高辭不仕明太祖
禮之使歸俱以壽終

王生續文獻通考逸其名咸寧雍端惠公與生同學既貴
往訪之時生已業農遇諸塗謂曰雍泰猶念貧賤之交乎
如不棄予當約期過汝泰諾至期肅冠帶以俟生布衣襤